

孟河馬良伯著

敬孫



悟

馬錫蕃署檢



醫悟婦科目錄

月經不調

室女經閉成損

暴崩下血

帶下

診婦人有孕法

惡阻

胎漏

胎動不安

半產

子懸

子眩

子煩

子癰

子鳴

子瘡

子腫

乳自出

娠妊小便不通

轉胞

孕婦內癰

熱病胎損

鬼胎

藥忌

臨產將護法

臨產須知

產後將護法

產後血暈

產後不語

產後顛狂

汗多變瘰

喘促

產後發熱

產後身痛

腰痛
胃脘少腹作痛

尋勞

產後乳疾

乳癰乳巖

乳卸

婦人隱疾

醫悟卷十

孟河馬冠羣長伯甫述

月經不調

經常也。一月一行。行有常期。無有後先。故謂之經。象月之每望則盈。滿。故謂之月信。如不應月。而愆其常期。則爲病。方書以趲前爲熱。退後爲寒。其理近似。然亦不可盡拘也。假如衝任帶空虛。氣不收攝。未及期而已行。豈可便謂爲熱。又如內熱蒸灼。榮血傷耗。已過期而經。尙乾澇不能下行。豈可便謂之寒。是寒熱之分。不在前後。在其本質。與病因。當參觀其兼症。如果脈數內熱。唇焦口燥。畏熱喜冷者。熱也。脈遲腹痠痛。唇淡口和。喜熱畏寒者。寒也。色鮮而多者。血有餘也。色

淡而少者。血不足也。將行而腹痛拒按者。氣滯血凝也。既行而腹痛喜按者。氣虛血少也。又有色紫而少。過時僅一見者。虛熱蒸偏。經漸乾枯也。將行而痛者。衝任帶受傷。血欲下時。空竭生痛也。有淋漓難下。氣怯神清者。客寒乘虛。攔入血海。逼迫下注。不容停留也。既行而痠痛者。脾腎臟氣衰弱也。經產症最多變幻。歧之中有歧。法之中有法。不可以常理常情驗。是在臨症者。神而明之。善變而通可矣。

室女經閉成損

室女經閉較已嫁者尤爲難治。胎產乳子之後。血脈空虛。一時客有不繼。營氣稍充。則經脈自通。室女天癸初足。元氣正旺。經行以時。原不應有間斷其閉也。非血海乾枯。卽伏寒凝泣。不則經脈轉逆。血海

枯則內熱欬嗽毛髮焦肉削色眊白漸成怯症伏寒襲則癰痞腹痛
體倦食少色青漸成痼症經脉逆轉則失其順行之常而爲吐爲衄
天癸本婦女命脉所繫月事時行氣血流通筋骸調暢雖有寒熱感
觸原不至停積爲患至於乾枯凝泣本根已撥生機促矣大法內熱
血漸枯者治以栢子仁丸烏賊骨丸唐氏烏雞丸劫勞歸神瓊玉膏
等伏寒經阻者治宜溫經散芍藥湯琥珀丸膠艾湯香砂六君小建
中等經脉逆轉者加減益母湯重用牛膝澤瀉二三十服自然經事
順利

暴崩下血

陰陽別論曰陰虛陽搏謂之崩言臟陰不足虛熱乘之迫血妄下也

過於作勞絡血傷損虛陽動而崩者宜參耆仲斷歸芍兼止瀉之味
鬱怒不解肝虛火旺不能藏血者宜生地白芍丹皮山梔阿膠牡蠣
側柏葉青苳根等心脾積傷不能充血者宜歸脾湯加龍骨白芍牡
蠣等血氣兩虧血崩不止宜生料十補大劑加首烏龍骨牡蠣絲綿
灰等婦女月事主於太衝繫於陽明陽明爲水穀之海水穀之氣變
化而爲血衝脈爲經脈之海主滲灌谿谷與陽明會於宗筋太衝脈
盛則月事以時下衝脈受傷榮血耗損帶脈不攝則非時暴下故崩
漏淋漓最重在衝帶任次在脾胃與吐血異與便血亦異仲斷牡蠣
龍骨絲綿棕櫚灰等無分何因均宜重用而寒涼苦降並在禁劑恐
血未止而寒已入腹痛脘呆甚且形寒厥逆是一波未平一波又起

也方書率治以吐衄便血儻侗法其能愈而無有後患者亦徼幸爾

帶下

史稱婦科爲帶下醫是帶固婦人首症也有心榮鬱結熱下移而爲帶者有脾氣衰弱不能轉運停濁爲帶者並皆挾濕而成始或淋漓不爭積久氣弱或兼辛勞思鬱漸至赤白雜下累旬積月腰膝痠疼神疲氣短飲食減少顏色不華致入損門其始甚微而爲患如是之甚通用異功散加薏仁山藥之類微欬氣不舒加桔梗生牡蠣內熱微煩加丹皮參棗仁食少體重倦加荷葉陳倉米倍冬朮腰痠足弱加杜仲續斷旬月不止加黃米龍骨赤白石脂甚或加澤瀉醋升麻固宜按症施治尤當先事預防慎無忽爲細微致於不可救挽也

診婦人有孕法

經謂婦人有孕者身有病而無邪脈也有病謂經停無邪脈謂脈息如常不斷絕也又曰手少陰脈動甚者孕子也少陰心也心主血脈心脈旺則血旺而爲孕子之兆又曰陰搏陽別謂之有子陰脈尺脈也陽脈寸脈也陰脈旺極別於陽脈此三者但得其一卽爲孕脈分而占之合而推之無遁情矣或謂流利雀啄亦爲孕脈何也曰流利者血脈充足往來滑澤卽陰搏陽別之謂雀啄者經脈凝結圓而堅實脈經有厥厥如豆動搖之言卽少陰脈動之謂並數月之胎也或曰孕有男女何以脈而知之曰左寸爲太陽脈浮大知爲男也右寸爲太陰脈沉實知爲女也若兩寸皆浮大主生二男兩手皆沉實主

生二女凡孕脉弦緊滑利爲順沉細微弱爲逆也

惡阻

娠妊經脉不行濁氣上干清道以致中脘停痰眩暈嘔吐胸膈滿悶
名曰惡阻法當理脾化痰升清降濁以安胃氣宜枳壳炒白朮香薷
橘紅建麴茯苓等治之脾虛者加參娠妊惡阻似屬尋常然嘔吐太
多胎元震動遂傷胎系致小產者多矣

胎漏

有已受孕經水忽來者曰胎漏陽明衝任熱鬱營血不安偏而下注
也血注太多胎元失養則胎將不保大法因風熱蒸動者用生地四
物送下防風黃芩丸本血虛者加杜仲膠艾嗔怒太過肝火升動逍

遙散去薑加酒芩若去血太多脾虛下陷者宜補中益氣加牡蠣杜仲絲綿灰升舉固攝之母氣既傷胎元卽不能長養鞏固不可不預防也如氣血俱盛而見血者乃小兒飲少也不必服藥

胎動不安

娠妊胎動不安有因升高捧重行止急促或鬱怒衝動或氣血虛弱根蒂不固或房室不謹宜各求其因而治之通用安胎飲操作過勞起居失宜加升麻當歸鬱火加黃芩山梔氣虛血弱加黃耆黨參房室加青芫根澤瀉如外感風寒胎動者急治其病胎氣自安凡胎動小產多在三月四月爲心胞絡三焦養胎之時二經屬火火性動而難靜母稟虛弱本有內熱以火乘熱胎元必致不安知此理者宜先

時再三申戒務使一切謹慎安詳萬一稍有不適卽當與以安胎方藥甯過而在事前無失之濡遲而貽後悔也

半產

受孕至三五月而胎墮或未足月而欲生並曰小產未產之時當以安胎爲急安胎飲主之既產而腹痛拒按者瘀血也法當祛瘀生新當歸澤蘭湯主之淋漓不止煩渴面赤脉虛微者氣血大虛也八珍湯加炮薑腹痛嘔瀉者脾胃虛也香砂六君加薑桂更宜慎風寒節飲食多服補藥以堅氣血毋使輕車熟路每一受孕輒復損動也

子懸

子眩

胎氣上逆緊塞胸次名曰子懸其症由悲怒傷肝者居多亦有起居

不愼或脾氣鬱結者宜紫蘇飲加減更有氣逆太甚因而厥暈者曰子眩雖與子懸相似然多由脾虛挾痰宜異功散加蘇子倍茯苓痰實者去參朮加竹瀝薑汁

子煩

子煩者煩心悶亂也或由素稟內熱重身轉側不安本有心煩加以胎火上衝則煩更甚治宜淡竹葉湯有氣壯痰凝胎火上犯因而悶亂者宜白朮橘紅黃芩蘇梗蘇子枳殼最忌嘔噁恐胎動不安也

子癇

妊娠血虛受風以致口噤肢搐腰背反張者曰子癇症最暴急恐妨胎氣挾風邪者宜羚羊角散定之鬱怒肝火加丹皮山梔胎氣上逆

佐以紫蘇飲挾痰加橘紅竹瀝杏仁中寒者加桂枝此症法宜急治若頻發無休非惟胎元驟下恐氣血隨胎渙散母命亦難保全也

子鳴

妊娠腹內有聲者曰子鳴兒在胎中口含血管或因孕婦登高舉臂兒口管脫則有聲當令孕婦曲腰就地如拾物狀一二刻間管入兒口其鳴卽止更服四物湯加白朮茯苓一二劑安固胎氣

子瘖

受孕八九月忽然不語爲子瘖人之胞胎繫於腎腎脈貫繫舌本胎氣壅閉腎脈阻塞故不能言但謹慎調攝及期生產自然復言或用四物湯加茯苓遠志調理亦可

子腫

妊娠面目肢體腫滿曰子腫又曰子氣係胞胎壅遏水氣流行不利脾氣又虛不能制水以致停蓄而泛濫治宜五皮飲加白朮茯苓腰以上腫宜發汗加秦艽荆芥防風腰以下腫宜利小便加車前澤瀉防己胎水通行氣機流暢生產自然順易此宜先時治之不可俟其既產再議治法轉致他患也

乳自出

妊娠乳自出者曰乳泣俗以爲生子不育之兆然亦由氣血虛弱不能統攝故乳汁先下宜八珍大劑補之不必拘執常說轉多枝節也

小便不通

轉胞

妊娠小便不通乃熱積小腸復爲胎元阻壓所致宜四物湯加黃芩
澤瀉猪苓主之或小便點滴不通者曰轉胞最屬危險急升舉其胎
使胎不下壓脬氣自然通利丹溪治用補中益氣隨服而探吐之然
探吐或恐胎氣上逆不如用茯苓升麻湯較爲平妥仲景治下焦虛
冷陰凝不化寒水斷流用桂附溫煖命門宣通陽氣佐以茯苓澤瀉
疏決水道然亦有陽亢陰消孤陽無陰不能化氣者必須補其真陰
治宜六味加車前牛膝

孕婦內癰

孕婦內癰較常人尤爲可慮始用枯萆散治之不應者與以牡丹皮
散丹皮苡仁桃仁本皆動胎之藥因有病則病當之故無損也

熱病胎損

娠妊熱病不解以致胎損腹中不能出者須驗產母面赤舌青者其子已損若面青舌赤母亦難痊古方通用黑神散然藥性燥烈不宜於熱病不如用平胃散加朴硝五錢下之較爲穩當

鬼胎

有經閉腹大狀如懷子面色青黃不澤脉濇細或乍大乍小兩手如出兩人或寒熱往來此本體虛弱氣機膈鬱精爽衰短邪氣侵凌非胎也宜雄黃丸攻之肝經鬱火佐以逍遙散脾氣鬱結佐以歸脾湯脾虛挾痰佐以六君間用安神定志丸佐之

藥忌